

FJALA E DEPUTETIT QANI XHAFA

Ë HËNË DATA 05 QERSHOR 2023

E nderuar drejtuese e seancës,

Të nderuar kolegë deputetë,

Të dashur qytetarë shqiptarë që na ndiqni,

Si deputet i ri i këtij parlamenti, e ndiej të domosdoshme të sqaroj opinionin publik në lidhje me pozicionin tim për sa i përket rritjes së rrogave për Presidentin, Kryeministrin, ministrat, deputetët e të tjerë, që u miratua në seancën e dytë, pasi unë bëra betimin si deputet. Është e vërtetë që Kryeministri, zoti Rama, nuk mori pjesë në votim, por unë mund të them me bindje të plotë se pa miratimin e tij këtu nuk kalon as miza. Përpara se të rriteshin rrogat tona, duhet të ishin rritur pensionet, pasi, aktualisht, janë në nivel skandaloz, 70-100 mijë lekë të vjetër për pensionistët në zonat rurale dhe 100-150 mijë lekë të vjetër për pensionistët në qytet; përpara se të rriteshin rrogat tona, duhet të ishin rritur pensionet e invalidëve, që janë në nivele të ulëta, të cilët nuk përballojnë ilaçet që u duhen, e jo më për të jetuar; përpara se të rriteshin rrogat tona, duhet të ishin rritur të ardhurat për familjet me ndihmë ekonomike, të cilave, me aq lekë sa trajtohen, 3 mijë deri në 8 mijë lekë të rinj, nuk u mjaftojnë që të jetojnë si qenie njerëzore. Pasi të ishin bërë këto rritje, duhej të kalonim te rritja për administratën shtetërore, jo me ato përqindje që u përmenden në seancat e kaluara, por me rritje të konsiderueshme, që edhe ata të shkojnë në punë me qejf e me kohë të plotë dhe ta përballojnë rritjen e madhe të çmimeve në vendin tonë.

Ashtu si zoti Kryeministër, i cili nuk mori pjesë në votimin për rritjen e rrogave tona, edhe unë të njëjtën gjë bëra. E bëra këtë jo se nuk doja rritje rroge, por më vinte zor nga ajo shtresë e popullsisë, e cila nuk u prek fare nga kjo rritje, ose u prek shumë pak dhe, me të drejtë, më thonë: “Vajte në parlament për të rritur rrogën tënde”. Zoti Kryeministër (për fat, nuk është, por, me sa pashë, është zëvendëskryeministrja), ju mburreni për dyfishimin e pagës minimale, nga 22 000 lekë në 40 000 lekë dhe, siç keni premtuar, vitin e ardhshëm do ta bëni 45 000 lekë. Paçka se kjo e rëndon biznesin e vogël, të mesëm apo atë të madh, unë e vlerësoj, por kjo rritje në fondin e sigurimeve duhet të reflektohej edhe me rritjen e pensioneve, që e përmenda më lart. Në këto kushte, ju bëj thirrje nga kjo foltore e parlamentit që të mblidhni Këshillin e Ministrave dhe në mbledhjen tuaj më të afërt të shikohet mundësia e rritjes së pensioneve për të gjitha kategoritë, në mënyrë që edhe pensionistët të mos presin zgjedhjet për të marrë ndonjë bonus apo të presin Vitin e Ri për ndonjë shpërblim, por të marrin atë që u takon, sepse kanë punuar një jetë të tërë dhe, mundësisht, të hiqet koncepti “pension fshati apo qyteti”, pasi edhe fshatari, i cili del në pension pleqërie, presupozohet se nuk e punon dot më tokën apo të mbarështojë blegtorinë, por duhet të jetojë si të gjithë të tjerët. Pra, zoti Kryeministër, të plotësohet minimumi jetik në Republikën e Shqipërisë, sepse e kemi për detyrë t’i ndihmojmë shtetasit tanë kudo që ndodhen, në fshat, në qytet, në kryeqytet apo edhe jashtë territorit të Republikës së Shqipërisë, pasi fuqia e një shteti duket te shtresat në nevojë, ndërsa këtu te ne ka ndodhur e kundërta. Deri tani jo vetëm që nuk i keni ndihmuar, por i keni sulmuar; i keni sulmuar për

riparimin e një çatie në fshatin më të thellë; i keni sulmuar për ndërtimin e një muri mbajtës apo të një muri rrethues në fshatin më malor; i keni sulmuar për ndërtimin e kotecit të pulave, për të mos thënë për kasollen e qenit. Prandaj, do t'ju lutem që të hiqen me ligj këto lloj lejesh, pasi në këtë kohë fushate i keni hequr për vota, sepse nuk i vjen e keqja shtetit nga këto ndërtime. Gjithashtu, të thjeshtohen dhe të lehtësohen procedurat për ndërtimet e reja në zonat rurale, por edhe ato urbane; të ulen tarifat e lejeve të ndërtimit për shtëpitë e reja dhe çdo gjë të bëhet e kontrolluar nga shteti, duke u bazuar në plane afatgjata. Deri në datën 13 maj, në të gjitha lagjet, fshatrat dhe njësitë administrative të Bashkisë së Elbasanit dhe të gjitha bashkive të qarkut investojnë me letra apo pa letra, por e rëndësishme ishte që bëhej punë, paçka se ajo bëhej për fushatë. Sa mbaruan zgjedhjet, çdo gjë u pre me thikë, asnjë lloj pune, paçka se ato janë të papërfunduara, vetëm festime dhe falënderime. Popullit duhet t'i shërbesh njësoj, si para zgjedhjeve, si gjatë zgjedhjeve, ashtu edhe pasi ato përfundojnë. Qarku i Elbasanit për nga popullsia është i treti, por për nga varfëria mbetet afër kreut të klasifikimit, për faktin se edhe nga qeveria qendrore në këta 10 vjet nuk është bërë aq sa duhet. Ju mburreni me investimin për "Formula 1" në Krastë të Elbasanit, por më parë duhej të ishte bërë bajpasi, që lidh autostradën Tiranë– Elbasan me Pogradecin dhe Korçën, pasi trafiku nga Bradasheshi në dalje të Elbasanit lë për të dëshiruar. Lajmi i mirë është që janë tenderuar lotet e tjera nga Miraka tek ura e Murrashit.

Nga informacionet që kam marrë, do të jetë rrugë me parametra, interurbane kryesore, me dy korsi për sens, me trafikndarëse të pakapërcyeshme. Para se të fillojnë punimet atje, dua t'ju kërkoj që banorët, të cilët preken nga kjo rrugë, të dëmshpërblehen me vlerën e tregut dhe jo me çmimet që u keni ofruar, 200 lekë për metër katror, sepse ata jetojnë me ato prona. Për lehtësimin e trafikut në Elbasan, derisa të bëhet bajpasi, dua t'ju sugjeroj të riparoni rrugën e vjetër nga ura e Zaranikës në drejtim të Bradasheshit, pasi do ta lehtësonte shumë trafikun në rrugën kryesore "Metalurgjik-kryqëzimi i luleve", që në Elbasan i thonë autostradë, pavarësisht se nuk është. Në mbyllje, dua t'ju sugjeroj kësaj qeverie ta kthejë kokën nga zonat rurale, pasi deri tani i ka lënë pas dore. Këta banorë kërkojnë gjërat më imediate: rrugë, ujë, ujë për vaditje, drita. Për këto të fundit është bërë diçka, por ende ka gjëra që duhen riparë. Ajo reforma e famshme e vitit 2015, i largoi shërbimet e pushtetit vendor ndaj banorëve. Kështu që në çdo njësi administrative, qeveria qendrore duhet të bëjë nga një investim të madh, që bashkia nuk mund t'i realizojë. Faleminderit!